

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**ZAKLJUČAK**  
o odbacivanju Prijave koncentracije privrednog subjekta „Blicnet“ d.o.o. Banja Luka i privrednog subjekta „NO LIMIT technology“ d.o.o. Sanski Most

**Sarajevo**  
**novembar, 2013. godine**



Broj: 05-26-1-025-5-II/13  
Sarajevo, 13.11.2013. godine

Na osnovu člana 25. stav (1) tačka e), člana 42. stav (2), a u vezi sa članom 14. Zakona o konkurenciji („Službeni glasnik BiH“, br. 48/05, 76/07 i 80/09), a rješavajući po Prijavi koncentracije privrednog subjekta „Blicnet“ društvo sa ograničenom odgovornošću za telekomunikacije Banja Luka, Majke Jugovića 25, 78000 Banja Luka, podnesenoj po advokatu Nihadu Sijerčiću, Trg djece Sarajevo 1, 71000 Sarajevo, zaprimljenoj dana 1.10.2013. godine pod brojem 05-26-1-025-II/13, Konkurencijsko vijeće, na 71. (sedamdesetprvoj) sjednici održanoj dana 13.11.2013. godine, donijelo je

### **ZAKLJUČAK**

1. Odbacuje se Prijava koncentracije privrednog subjekta „Blicnet“ društvo sa ograničenom odgovornošću za telekomunikacije Banja Luka, Majke Jugovića 25, 78000 Banja Luka, Bosna i Hercegovina, radi nepostojanja obaveze prijave koncentracije u smislu člana 14. stav (1) Zakona o konkurenciji.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće je zaprimilo, dana 1.10.2013. godine pod brojem: 05-26-1-025-II/13, Prijavu koncentracije (u daljem tekstu: Prijava), podnesenu po punomoćniku Nihadu Sijerčiću, advokatu iz Sarajeva, Trg djece Sarajeva 1/V, 71000 Sarajevo (punomoć broj 8950/13 od dana 25.9.2013. godine), kojom privredni subjekt „Blicnet“ (raniji naziv „Aneks“ d.o.o. Banja Luka) društvo sa ograničenom odgovornošću za telekomunikacije Banja Luka, Majke Jugovića 25, 78000 Banja Luka (u daljem tekstu: Podnosilac prijave ili „Blicnet“) namjerava steći kontrolu nad dijelovima privrednog subjekta „NO LIMIT technology“ d.o.o. Sanski Most, Prijedorska bb, 79260 Sanski Most, kupovinom osnovnih sredstava i pripadajuće opreme, odobrenja, licenci, atesta i drugih saglasnosti i prava koja se odnose na predmetna osnovna sredstva, koja isti posjeduje na teritoriji općina Sanski Most, Cazin, Bosanska Krupa, Bužim i Velika Kladuša.

Uvidom u podnesenu Prijavu utvrđeno je da nije potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 9., 10. i 11. Odluke o načinu podnošenja prijave i kriterijima za ocjenu koncentracija privrednih subjekta («Službeni glasnik BiH», broj 34/10) te je Konkurencijsko vijeće zatražilo dopunu iste, u skladu sa članom 31. istoga Zakona (akt broj: 05-26-1-025-1-II/13 od dana 07.10.2012. godine).

Podnosilac prijave je dopunio Prijavu traženom dokumentacijom (podnesak broj: 05-26-1-025-2-II/13 od dana 11.10.2013. godine).

Po prijemu tražene dokumentacije Konkurencijsko vijeće je utvrdilo da je Prijava kompletna, te izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 7.11.2013. godine pod brojem: 05-26-1-025-3-II/13.

Podnosilac prijave je naveo, u smislu člana 30. stav (2) Zakona, da nema obavezu podnijeti zahtjev za ocjenu koncentracije nekom drugom tijelu za konkurenciju izvan teritorije Bosne i Hercegovine.

Konkurencijsko vijeće je uvidom u dostavljenu dokumentaciju utvrdilo da je prijava podnesena u smislu člana 16. stav (2) Zakona.

## **1. Učesnici koncentracije**

Učesnici koncentracije su privredni subjekti „Blicnet“ društvo sa ograničenom odgovornošću za telekomunikacije Banja Luka, Majke Jugovića 25, 78000 Banja Luka i „NO LIMIT technology“ d.o.o. Sanski Most, Prijedorska bb, 79260 Sanski Most.

### **1.1. Privredni subjekt „Blicnet“ d.o.o. Banja Luka**

Privredni subjekt „Blicnet“ društvo sa ograničenom odgovornošću za telekomunikacije Banja Luka, Majke Jugovića 25, 78000 Banja Luka, osnovan je u 1992. godini i registrovan u Osnovnom sudu Banja Luka, pod brojem: 1-3645-00, sa osnovnim kapitalom u iznosu od 11.549.507,00 KM.

Privredni subjekt „Blicnet“ je u 100,00% vlasništvu privrednog subjekta „Telekom Slovenije“ d.d. Ljubljana, Cigaletova 15, 1000 Ljubljana, Republika Slovenija (u daljem tekstu: „Telekom Slovenije“).

Regulatorna agencija za komunikacije Bosne i Hercegovine je privrednom subjektu „Blicnet“ izdala sljedeće važeće dozvole:

- Dozvolu za obavljanje djelatnosti operatora javnih elektronskih komunikacijskih mreža broj 18/13 UPI: 02-07-121/13 od dana 1.04.2013. godine,
- Dozvolu za obavljanje djelatnosti davaoca pristupa internetu broj DPIU – TS/011/13 UPI: 02-07-121/13 od dana 1.04.2013. godine,
- Dozvolu za distribuciju audiovizuelnih medijskih usluga i medijskih usluga radija broj 322-DP UPI – 02-07-162/13 od dana 4.02.2013. godine,
- Dozvolu za pružanje fiksnih javnih telefonskih usluga broj DFTU – 03/13 od dana 30.08.2013. godine,
- Rješenje o registraciji davaoca mobilnih telefonskih usluga broj UP1: 02-07-654/13 od dana 2.09.2013. godine.

Pretežna registrovana djelatnost privrednog subjekta „Blicnet“ je oblast pružanja telekomunikacijskih usluga, interneta i usluge distribucije RTV programa, planiranja i razvoja računarskih mreža, prodaja opreme potrebne za povezivanje računarskih LAN (Local Area Network) i WAN (Wide Area Network) mreža, te implementacija IP telefonije.

Direktor privrednog subjekta „Blicnet“, Igor Bohorč je ujedno i direktor privrednog subjekta „SiOL“ d.o.o. Sarajevo. Niti jedan drugi član uprave ili nadzornog odbora privrednog subjekta „Telekom Slovenije“ niti privrednog subjekta „Blicnet“ nije istovremeno član uprave ili nadzornog odbora bilo kojeg drugog privrednog subjekta na relevantnom tržištu.

### **1.1.1. Povezana društva privrednog subjekta „Blicnet“ na tržištu Bosne i Hercegovine**

Privredni subjekt „Telekom Slovenije“, kao vlasnik privrednog subjekta „Blicnet“ je 100,00% vlasnik privrednog subjekta „SiOL“ društvo sa ograničenom odgovornošću za pružanje telekomunikacijskih usluga Sarajevo, ul. Tešanjka 24a, 71000 Sarajevo, registrovan u Općinskom sudu Sarajevo, matični broj: 65-01-0671-11, dana 19.8.2011. godine (u daljem tekstu: „SiOL“).

Pretežna registrovana djelatnost privrednog subjekta „SiOL“ je izgradnja telekomunikacijske infrastrukture s ciljem izdavanja u zakup drugim zainteresovanim operaterima.

Regulatorna agencija za komunikacije BiH je dana 6.6.2012. godine izdala privrednom subjektu „SiOL“ Opću dozvolu za javnog mrežnog operatera broj DMOR – TS/148/12.

Navedeni privredni subjekt trenutno investira u izgradnju optičkog spojnog puta od Istočnog Sarajeva do granice sa Crnom Gorom i trenutno se ne bavi pružanjem telekomunikacijskih usluga krajnjim korisnicima.

### **1.2. Privredni subjekt „NO LIMIT technology“ d.o.o. Sanski Most**

Privredni subjekt „NO LIMIT technology“ d.o.o. Sanski Most, Prijedorska bb, 79260 Sanski Most, je upisan u registar privrednih subjekata Kantonalnog suda u Bihaću, pod matičnim brojem 1-4704-00, dana 11.6.2001. godine, osnovan od strane fizičkog lica, ((..)\*\*<sup>1</sup>), sa upisanim osnovnim kapitalom u iznosu od 2.000,00 KM.

Pretežna registrovana djelatnost privrednog subjekta je pružanje usluga bežičnog interneta, te usluge digitalne bežične televizije (MMDS usluga) kojim pokriva skoro cijelu teritoriju Sanskog Mosta.

Privredni subjekt „NO LIMIT technology“ je nosilac slijedećih dozvola Regionalne agencije za komunikacije BiH:

- Opće dozvole za javnog mrežnog operatera broj DMOL-TS/126/10 od dana 1.9.2010. godine,
- Opće dozvole za pružanje internet usluga broj DPIU-TS/096/09 od dana 28.5.2009. godine,
- Dozvole za distribuciju audiovizuelnih medijskih usluga i medijskih usluga radija broj 059-DP od dana 4.2.2013. godine.

## **2. Pravni okvir ocjene koncentracije**

Konkurencijsko vijeće je u provođenju postupka ocjene dopuštenosti predmetne koncentracije primijenilo odredbe Zakona, Odluke o utvrđivanju relevantnog tržišta („Službeni glasnik BiH“, br. 18/06 i 34/10) i Odluke o načinu podnošenja prijave i kriterijima za ocjenu koncentracija privrednih subjekata.

## **3. Pravni osnov i oblik predmetne koncentracije**

Kao pravni osnov ove koncentracije Podnosilac prijave je dostavio, u smislu člana 30. stav (1) tačka a) Zakona i člana 9. tačka f) alineja 5. Odluke o načinu podnošenja prijave i kriterijima za ocjenu

---

<sup>1</sup> (..)\*\* podaci predstavljaju poslovnu tajnu

koncentracija privrednih subjekta, Pismo namjere potpisano od učesnika predmetne koncentracije dana 11.9.2013. godine.

Navedenom potpisivanju Pisma namjere prethodile su određene transakcije koje je preduzeo privredni subjekt „NO LIMIT technology“, te su iste sastavni dio transakcije ugovorene Pismom namjere i budućeg ugovora o kupoprodaji, kako slijedi:

- Rješenjem Općinskog suda u Bihaću broj: 017-0-Reg-13-000471 od dana 23.8.2013. godine, privredni subjekt „WNET“ d.o.o. Cazin, ul. Jošani bb, 77220 Cazin, je pripojio poslovni subjekt „TEHNI – NET“ d.o.o. Cazin, Tržac bb, 77220 Cazin, te je postao njegov pravni slijednik, što uključuje i vlasništvo nad svom imovinom ovog privrednog subjekta, uključujući mrežu na području općine Cazin.
- Ugovorom o kupoprodaji osnovnih sredstava OPU broj 1330/13 zaključenim dana 3.9.2013. godine privredni subjekt „WNET“ d.o.o. Cazin, kao prodavac i privredni subjekt „NO LIMIT technology“, kao kupac, ugovorili su prenos prava vlasništva nad osnovnim sredstvima kablovske distributivne mreže i bežičnog sistema na području općina Cazin, Velika Kladuša, Bosanska Krupa i Bužim (uključujući mrežu koja je ranije pripadala pripojenom privrednom subjektu „TEHNI – NET“ d.o.o. Cazin) sa privrednog subjekta „WNET“ d.o.o. Cazin na privredni subjekt „NO LIMIT technology“ kao kupca.

U skladu sa navedenim Pismom namjere, privredni subjekt „BLICNET“ namjerava da kupi osnovna sredstva i pripadajuću opremu, odobrenja, licence, ateste i sve druge saglasnosti i prava koja se odnose na predmetna osnovna sredstva – kablovske distributivne mreže, a koja se koriste za obavljanje djelatnosti telekomunikacija i u vlasništvu su privrednog subjekta „NO LIMIT technology“, a koja su izgrađena na teritoriji općine Sanski Most, kao i na mreži koju je prethodno otkupio od privrednog subjekta „WNET“ d.o.o. Cazin, a koja se nalaze na području općina Cazin, Velika Kladuša, Bosanska Krupa i Bužim, a uključuju i mrežu koja je ranije pripadala privrednom subjektu „TEHNI – NET“ d.o.o. Cazin, koje je prestalo da postoji dana 23.8.2013. godine pripajanjem privrednom subjektu „WNET“ d.o.o. Cazin.

Privredni subjekt „Blicnet“ istovremeno izražava i namjeru da kupovinom navedenih osnovnih sredstava i preuzimanjem pripadajućih prava i obaveza, izvrši i preuzimanje korisnika telekomunikacionih usluga privrednog subjekta „NO LIMIT technology“, tj. indirektno korisnika usluga privrednih subjekta „WNET“ d.o.o. Cazin i „TEHNI – NET“ d.o.o. Cazin, koji koriste iste na nekim od kablovskih distributivnih odnosno wireless sistema, na teritoriji navedenih općina.

U skladu sa članom 12. stav (1) tačka b) pod 3) Zakona, pravni oblik koncentracije predstavlja sticanje kontrole privrednog subjekta „Blicnet“, nad dijelom privrednog subjekta „NO LIMIT technology“ na drugi način - kupovinom osnovnih sredstava istog.

#### **4. Relevantno tržište učesnika koncentracije**

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda /usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta, relevantno tržište u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuju od uslova tržišne konkurencije na susjednim geografskim tržištima.

Obzirom na navedeno, a na osnovu provedene analize relevantnih tržišta učesnika koncentracije, Konkurencijsko vijeće je utvrdilo da postoje dva relevantna tržišta proizvoda/usluga koncentracije i to tržište internet usluga i tržište pružanja usluga kablovske distribucije RTV programa.

Relevantno tržište u geografskom smislu predmetne koncentracije je tržište općina Sanski Most, Cazin, Bosanska Krupa, Velika Kladuša i Bužim.

Slijedom gore navedenog, relevantnim tržištima predmetne koncentracije smatraju se tržište pružanja internet usluga i tržište pružanja usluga kablovske distribucije RTV programa, u općinama Sanski Most, Cazin, Bosanska Krupa, Velika Kladuša i Bužim.

## 5. Analiza relevantnog tržišta predmetne koncentracije u Bosni i Hercegovini

U analizi relevantnih tržišta učesnika koncentracije i njihovih glavnih konkurenata, kao i procjenama tržišnih udjela, korišteni su podaci Regulatorne agencije za komunikacije Bosne i Hercegovine (u daljem tekstu: RAK) i podaci Podnosioca prijave.

### 5.1. Analiza tržišta internet usluga

Procjena tržišnih udjela učesnika koncentracije i njihovih konkurenata na relevantnom tržištu pružanja internet usluga u 2012. godini:

Tabela 1.

R.br.	Naziv privrednog subjekta	Sanski Most	Cazin	Bosanska Krupa	Velika Kladuša	Bužim
1.	<b>Blicnet</b>	(..)**%	(..)**%	(..)**%	(..)**%	(..)**%
2.	<b>No Limit</b>	(..)**%	(..)**%	(..)**%	(..)**%	(..)**%
3.	<b>WNET d.o.o. Cazin</b>	(..)**%	(..)**%	(..)**%	(..)**%	(..)**%
4.	BH Telecom d.d. Sarajevo	(..)**%	(..)**%	(..)**%	(..)**%	(..)**%
5.	Miss Net d.o.o. Bihać	(..)**%	(..)**%	(..)**%	(..)**%	(..)**%
6.	BHB Cable TV d.o.o. Lukavac	(..)**%	(..)**%	(..)**%	(..)**%	(..)**%
7.	TELINEA d.o.o. Sanski Most	(..)**%	(..)**%	(..)**%	(..)**%	(..)**%
8.	Ostali	(..)**%	(..)**%	(..)**%	(..)**%	(..)**%
9.	<b>Ukupno 1+2+3</b>	(..)**%	(..)**%	(..)**%	(..)**%	(..)**%
10.	<b>Ukupno</b>	100,00%	100,00%	100,00%	100,00%	100,00%

Izvor: Podaci iz prijave

Analizom podataka, Konkurencijsko vijeće je utvrdilo da zajednički tržišni udio učesnika koncentracije na relevantnom tržištu pružanja internet usluga na teritoriji općina Sanski Most, Cazin, Bosanska Krupa, Velika Kladuša i Bužim nije veći od 40,00%.

## 5.2. Analiza pružanja usluga kablovske distribucije RTV programa

Procjena tržišnih udjela učesnika koncentracije i njihovih konkurenata na relevantnom tržištu pružanja usluga kablovske distribucije RTV programa u 2012. godini:

Tabela 2.

R. br.	Naziv privrednog subjekta	Sanski Most	Cazin	Bosanska Krupa	Velika Kladuša	Bužim
1.	Blicnet	(..)**%	(..)**%	(..)**%	(..)**%	(..)**%
2.	No Limit	(..)**%	(..)**%	(..)**%	(..)**%	(..)**%
3.	WNET d.o.o. Cazin	(..)**%	(..)**%	(..)**%	(..)**%	(..)**%
4.	BH Telecom d.d. Sarajevo	(..)**%	(..)**%	(..)**%	(..)**%	(..)**%
5.	Miss Net d.o.o. Bihać	(..)**%	(..)**%	(..)**%	(..)**%	(..)**%
6.	BHB Cable TV d.o.o. Lukavac	(..)**%	(..)**%	(..)**%	(..)**%	(..)**%
7.	TELINEA d.o.o. Sanski Most	(..)**%	(..)**%	(..)**%	(..)**%	(..)**%
8.	Ostali	(..)**%	(..)**%	(..)**%	(..)**%	(..)**%
9.	Ukupno 1+2+3	(..)**%	(..)**%	(..)**%	(..)**%	(..)**%
10.	Ukupno	100,00%	100,00%	100,00%	100,00%	100,00%

Izvori: Podaci iz prijave

Analizom podataka, Konkurencijsko vijeće je utvrdilo da zajednički tržišni udio učesnika koncentracije na relevantnom tržištu pružanja usluga kablovske distribucije RTV programa na teritoriji općina Sanski Most, Cazin, Bosanska Krupa, Velika Kladuša i Bužim nije veći od 40,00%.

## 6. Obaveza prijave namjere predmetne koncentracije

Obaveza prijave koncentracije privrednih subjekta sa sjedištem u Bosni i Hercegovini, u smislu člana 14. stav (1) pod b) Zakona, u vezi sa članom 14. stav (1) tačka (b) Zakona, u vezi sa članom 2. Odluke o načinu podnošenja prijave i kriterijima za ocjenu koncentracije privrednih subjekta („Službeni glasnik BiH“, broj 34/10), postoji ako ukupni godišnji prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje 8.000.000,00 KM po završnom računu u godini koja je prethodila koncentraciji, ili ako je njihov zajednički udio na relevantnom tržištu veći od 40,00%.

Ukupni godišnji prihodi privrednih subjekta učesnika predmetne koncentracije, sa podacima o prihodu relevantnom za predmetnu koncentraciju na dan 31. decembra 2012. godine, iznose:

Tabela 3.

KM	Telekom Slovenije	„Blicnet“	NO LIMIT technology			
			NO LIMIT	WNET	TEHNI - NET	Ukupno
			a.	b.	c.	a+b+c
Svijet	(..)**	/	/	/	/	/
BiH	(..)**	(..)**	(..)**	(..)**	(..)**	(..)**
BiH*	/	(..)**	(..)**	(..)**	(..)**	(..)**

Izvor: podaci iz Prijave; \* podaci o prihodu u smislu člana 14. stav (3) Zakona

Godišnji prihodi učesnika koncentracije predstavljaju ukupne prihode (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 9. tačka h) Odluke o načinu podnošenja prijave i kriterijima za ocjenu koncentracija privrednih subjekta.

Članom 14. stav (3) Zakona je utvrđeno da u slučaju da se koncentracija odnosi na spajanje ili pripajanje dijela ili dijelova jednog ili više privrednih subjekta, bez obzira da li ti dijelovi imaju status pravnog lica, pri izračunavanju prihoda, obračunavat će se samo prihod onih dijelova privrednog subjekta koji su predmet kontrole koncentracije.

Prema podacima iz Prijave (Tabela 3.) učesnici koncentracije nisu ispunili uslov ukupnog godišnjeg prihoda, u smislu člana 14. stav (1) tačka b) Zakona.

Također, u smislu naprijed navedenog, učesnici koncentracije nisu ispunili ni uslov da je njihov zajednički tržišni udio na relevantnom tržištu veći od 40,00% (Tabele 1. i 2.).

Na osnovu naprijed navedenog, utvrđeno je da privredni subjekt „Blicnet“ nije bio obavezan podnijeti prijavu koncentracije u smislu člana 14. Zakona, te je odlučeno kao u dispozitivu.

## **7. Administrativna taksa**

Podnosilac Prijave na ovaj Zaključak, u skladu sa članom 2. Tarifni broj 108. tačka c) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, br. 30/06 i 18/11) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

## **8. Pouka o pravnom lijeku**

Protiv ovoga Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Zaključka.

**Predsjednik**

**Gordan Raspudić**